

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**ODLUKA
O UTVRĐIVANJU PROGRAMA PROVOĐENJA STATISTIČKIH
ISTRAŽIVANJA OD INTERESA ZA FEDERACIJU BOSNE I HERCEGOVINE
ZA PERIOD 2017.-2020. GODINE**

Sarajevo, oktobar 2016.godine

Na osnovu člana 18. stav 4. Zakona o statistici u Federaciji Bosne i Hercegovine („Službene novine Federacije BiH“, br. 63/03 i 9/09) Parlament Federacije Bosne i Hercegovine, na sjednici Predstavničkog doma Parlamenta Federacije Bosne i Hercegovine održanoj dana _____ i na sjednici Doma naroda Parlamenta Federacije Bosne i Hercegovine održanoj dana _____ na prijedlog Vlade Federacije Bosne i Hercegovine, donosi

**ODLUKU
O UTVRĐIVANJU PROGRAMA PROVOĐENJA STATISTIČKIH ISTRAŽIVANJA
OD INTERESA ZA FEDERACIJU BOSNE I HERCEGOVINE
ZA PERIOD 2017.-2020. GODINE**

I.

Ovom odlukom se utvrđuje Program provođenja statističkih istraživanja od interesa za Federaciju Bosne i Hercegovine za period 2017.-2020. godine (u daljnjem tekstu: Program provođenja statističkih istraživanja), koji će se provoditi na teritoriji Federaciji Bosne i Hercegovine.

II.

Program provođenja statističkih istraživanja nalazi se u prilogu ove odluke i čini njen sastavni dio.

III.

Program provođenja statističkih istraživanja finansirat će se iz sredstava Federalnog zavoda za statistiku koja se obezbjeđuju u Budžetu Federacije Bosne i Hercegovine.

IV.

Federalni zavod za statistiku i drugi ovlašteni organi za poslove statistike su odgovorni za provođenje Programa provođenja statističkih istraživanja.

V.

Ova odluka stupa na snagu osmog dana od dana objavljivanja u „Službenim novinama Federacije BiH“.

PF broj...../16.

..... 2016. godine

Sarajevo

Predsjedavajuća
Doma naroda
Parlamenta Federacije BiH
Lidija Bradara s.r.

Predsjedavajući
Predstavničkog doma
Parlamenta Federacije BiH
Edin Mušić s.r.

OBRAZLOŽENJE
PRIJEDLOGA ODLUKE O UTVRĐIVANJU PROGRAMA
PROVOĐENJA STATISTIČKIH ISTRAŽIVANJA
OD INTERESA ZA FEDERACIJU BOSNE I HERCEGOVINE
ZA PERIOD 2017.-2020. GODINE

I. ZAKONSKA OSNOVA ZA DONOŠENJE ODLUKE

Zakonska osnova za donošenje ove odluke sadržana je u odredbi člana 18. stav 4. Zakona o statistici u Federaciji Bosne i Hercegovine („Službene novine Federacije BiH“ broj 63/03 i 9/09) kojom je utvrđeno da Nacrt Programa provođenja statističkih istraživanja od interesa za Federaciju Bosne i Hercegovine (u daljnjem tekstu: Program statističkih istraživanja) priprema Federalni zavod za statistiku, a donosi ga Parlament Federacije Bosne i Hercegovine na prijedlog Vlade Federacije Bosne i Hercegovine.

II. RAZLOZI ZA DONOŠENJE ODLUKE

Program je višegodišnji strateški statistički dokument koji je definisan na osnovu potreba korisnika i zahtjeva Evropske unije i pruža pravni, institucionalni i programski okvir za proizvodnju i diseminaciju statističkih podataka i organizaciju sistema zvanične statistike u Federaciji Bosne i Hercegovine.

Programom se usklađuje sadržina statističkih podataka sa potrebama u Federaciji BiH te definišu aktivnosti koje će omogućiti da se u narednom periodu izvrši harmonizacija statističkih istraživanja i indikatora sa standardima Evropskog statističkog sistema.

Aktivnosti definisane Programom detaljno se razrađuje u godišnjim planovima statističkih istraživanja od interesa za Federaciju Bosne i Hercegovine, na osnovu kojih se prati godišnja realizacija Programskih aktivnosti.

Prioritetni zadaci ovog Programa su:

Razvoj sistema zvanične statistike i usaglašavanje sa međunarodnim i evropskim standardima, jačanje povjerenja u zvaničnu statistiku kroz saradnju sa davaocima i korisnicima podataka, unaprijeđenje saradnje i učinkovitost sistema zvanične statistike, razvoj ljudskih potencijala.

Za uspješnu realizaciju strateških ciljeva neophodna je realizacija međunarodnih projekata koji su namjenjeni za unaprijeđenje statističkog sistema kao i bilateralna saradnja sa drugim nacionalnim statističkim institucijama u cilju razmjene iskustava i unaprijeđenja zvanične statistike.

Programom statističkih istraživanja definisan je okvir rada statistike Federacije Bosne i Hercegovine, misija, vizija, vrijednosti i glavni faktor podrške za realizaciju statističke aktivnosti, prioritetni zadaci, osnovni ciljevi statistike Federacije Bosne i Hercegovine u periodu 2017.-2020. godine, kao i prioritetne aktivnosti po statističkim područjima

III.USKLAĐENOST PROPISA SA EVROPSKIM ZAKONODAVSTVOM

Predloženom odlukom se ne vrši usklađivanje zakonodavstva Federacije Bosne i Hercegovine sa pravnom stečevinom Evropske unije, tako da se iz tog

razloga uz prijedlog propisa ne dostavlja Izjava o usklađenosti, niti Usporedni prikaz usaglašenosti.

IV. PROVEDBENI MEHANIZMI I NAČIN OSIGURAVANJA PROPISA

Tačkom IV. odluke definisan je način provođenja odluke, te je Federalni zavod za statistiku u okviru svojih zakonskih nadležnosti, određen kao institucija zadužena za realizaciju odluke.

U skladu sa Zakonom o statistici u Federaciji Bosne i Hercegovine, Federalni zavod za statistiku je ovlašten da osigura blagovremeno provođenje svih statističkih istraživanja utvrđenih Programom provođenja statističkih istraživanja. Federalni zavod za statistiku putem mehanizma pokretanja prekršajnog postupka protiv izvještajnih jedinica koje ne dostavljaju potrebne statističke izvještaje osigurava poštivanje odredbi ove odluke.

V. OPIS KONSULTACIJA VOĐENIH U PROCESU IZRADE PROPISA

Prilikom izrade Nacrta Programa statističkih istraživanja Federalni zavod za statistiku se, u pogledu sadržaja Programa statističkih istraživanja, konsultovao sa svim federalnim ministarstvima i sa organima i organizacijama koji su ovlašteni za provođenje statističkih istraživanja (Federalno ministarstvo unutrašnjih poslova, Federalno ministarstvo pravde, Federalno ministarstvo finansija, Porezna uprava Federacije BiH-središnji ured, Federalno ministarstvo energije, rudarstva i industrije, Federalno ministarstvo prometa i komunikacija, Federalno ministarstvo rada i socijalne politike, Federalno ministarstvo raseljenih osoba i izbjeglica, Federalno ministarstvo za pitanja boraca i invalida odbrambeno-oslobodilačkog rata, Federalno ministarstvo zdravstva, Federalno ministarstvo obrazovanja i nauke, Federalno ministarstvo kulture i sporta, Federalno ministarstvo trgovine, Federalno ministarstvo prostornog uređenja, Federalno ministarstvo poljoprivrede, vodoprivrede i šumarstva, Federalno ministarstvo razvoja, poduzetništva i obrta, Federalno ministarstvo okoliša i turizma, Federalna uprava za geodetske i imovinsko-pravne poslove, Federalni zavod zdravstvenog osiguranja i reosiguranja, Federalni zavod PIO/MIO i dr.).

Pored dostavljanja nacrta Programa provođenja statističkih istraživanja od interesa za Federaciju BiH naprijed navedenim subjektima, nacrt Programa je, u skladu sa Uredbom o pravilima za učešće zainteresirane javnosti u postupku pripreme federalnih pravnih propisa i drugih akata, objavljen i na web stranici Federalnog zavoda za statistiku sa mogućnošću davanja prijedloga i sugestija.

VI. PROCJENA EKONOMSKE OPRAVDANOSTI DONOŠENJA PROPISA

Donošenje Odluke o utvrđivanju Programa provođenja statističkih istraživanja od interesa za Federaciju Bosne i Hercegovine nema direktne finansijske efekte, niti značajno utiče na operativne troškove obavljanje poslovanja, niti na priliv sredstava u javne budžete. Donošenjem Odluke o utvrđivanju Programa provođenja statističkih istraživanja se prije svega osigurava pouzdanost i kvalitet statističkih podataka koji predstavljaju osnovu za planiranje svih javnih politika i odluka na različitim nivoima vlasti, kao i osnovu za donošenje finansijskih i drugih odluka domaćih i inostranih poslovnih subjekata.

VII. OBRAZLOŽENJE FINANSIJSKIH SREDSTAVA ZA PROVOĐENJE PROPISA

Sredstva neophodna za realizaciju ove odluke se obezbjeđuju u Budžetu Federalnog zavoda za statistiku.

VIII.RASPORED EVENTUALNOG PONOVOG PREISPITIVANJA DONESENOG PROPISA

Tačkom V. Odluke propisano je da Odluka stupa na osmog dana od dana objave u „Službenim novinama Federacije BiH“.

S obzirom da se Odluka donosi za period od četiri godine, sve eventualne promjene koje su uslovljene ekonomskim, društvenim i ostalim promjenama će biti revidirane u okviru procedure donošenja Odluke za naredni period.

U skladu sa Zakonom o statistici u Federaciji Bosne i Hercegovine i Uredbom o procesu trogodišnjeg i godišnjeg planiranja i godišnjeg izvještavanja u federalnim ministarstvima i institucijama, Federalni zavod za statistiku podnosi izvještaje o radu Vladi Federacije Bosne i Hercegovine.